



Služba za saobraćaj, stambeno-komunalne poslove i građenje

OPĆINSKO VIJEĆE ILIJAŠ

**Odgovori na vijećnička pitanja i inicijative sa 44. sjednice Općinskog vijeća Ilijaš
održane dana 29.07.2020.godine**

Ilijaš: Septembar 2020.godine

AKIF BEŠLIJA – vijećnik SBB

Inicijativa: "Pokrećem inicijativu prema nadležnoj općinskoj službi da se izvrši prokresivanje i čišćenje puta na potezu od kontejnera na Vratuši pa do mosta i skretanja za Mrakovo.

Obrazloženje: Radi se o tome da je pomenuta dionica uveliko sužena zbog rastinja i drveća, koje je izraslo sa obje strane puta, sprečava preglednost učesnika u saobraćaju, gdje dolazi do sve češćih udesa, neke evidentira policija, a neke ne, jer se radi o obostranoj krivici. Molim vas da nadležna služba iznađe rješenje za ovaj problem i da se u skorije vrijeme to riješi".

Odgovor: Dat je nalog Izvođaču radova da izvrši kresanje grana u putnom pojasu lokalnog puta "raskrsnica za Vratušu-raskrsnica za Mrakovo".

Meho Džindo – samostalni vijećnik

Pitanje-inicijativa: "S obzirom da je Općina Ilijaš osnivač JKP "Vodostan" d.o.o. Ilijaš, pokrećem inicijativu da mi se odgovori na izjave koje sam podnio ovom preduzeću dana 17. 06. 2020. godine.

Obrazloženje: Prva izjava koju sam potpisao u prostorijama ovog preduzeća odnosila se na iznos računa za potrošnju vode, odnosno kanalizacione mreže, koju održava i kojom upravlja ovo preduzeće. Pod punom moralnom i krivičnom odgovornošću, potpisao sam izjavu da u mjestu Gornje Mrakovo, gdje posjedujem porodičnu kuću, nisam priključen na kanalizacionu mrežu, već posjedujem septičku jamu u vlastitom dvorištu. Tražio sam da mi se umanju iznos cca 40,00KM, jer su mi nezakonito, od novembra prošle godine, naplaćivali iznos za korištenje kanalizacione mreže. Na pitanje moje supruge zbog čega mi se naplaćivao ovaj iznos, službenica je odgovorila da me neko prijavio. Navodno su nekom povjerovali, a mene nikad nisu kontaktirali. Sljedeći račun, koji sam dobio bio je umanjnjen u iznosu koji sam naveo, tj. račun je umanjnjen od kada su počeli sa primjenom plaćanja kanalizacione mreže. Iako smo supruga i ja napisali izjavu u ovom preduzeću da ne koristimo kanalizacionu mrežu, ovo preduzeće ponovo šalje dopis kojim me obavještavaju da ponovo dostavim izjavu da nisam priključen na kanalizacionu mrežu, ovjerenu od strane nadležnog općinskog organa. E to se neće dogoditi. Stvarno činjenično stanje ste mogli i možete provjeriti na licu mjesta. Mogli ste kontaktirati komunalnog inspektora, predsjednika Savjeta Mjesne zajednice, ako je vama teško otići na lice mjesta. Ispada da sam se ja ilegalno priključio na kanalizacionu mrežu. Samim tim sam učinio prekršajni postupak. Vi ste ovakvim postupkom podcijenili mene i moju porodicu. Ja sam u životu sve legalno i na zakonitim osnovama radio, zato ću ja shodno zakonskim propisima tražiti Vašu odgovornost, jer sam kao osoba povrijeđen i ponižen od strane menadžmenta ovog preduzeća.

Drugi zahtjev - izjavu sam potpisao istog dana, tj. 17. 06. 2020. godine. Tražio sam od menadžmenta preduzeća da zakaže jedan sastanak, na kojem bismo pokušali riješiti pitanje pumpne stanice, vlasništvo ovog preduzeća, koje se nalazi na mom zemljištu, označenom kao k.č. broj 1813 K.O. Podgora I. Nikad nisam dobio odgovor po ovom pitanju. U kopiji katastarskog plana nije ucrtan ovaj objekat, što znači da je sagrađen bez urbanističke i građevinske dozvole. Pored toga, izgradnjom ovog objekta, moje zemljište je presječeno na dva dijela, a jedan manji dio je u potpunosti neiskorišten. Osim toga, da nema ovog objekta, mogao bih izgraditi pravi pristupni put do moje stambene kuće. Objekat je u veoma lošem građevinskom stanju, pa samim tim narušava izgled moje okućnice, a ulaganjem simboličnih finansijskih sredstava, ovaj objekat bi odgovarao svojoj namjeni. Ja znam šta znači ovaj objekat za lokalno stanovništvo, ali ovakvim pristupom menadžmenta preduzeća, ja ću iz više razloga tražiti rješavanje ovog pitanja kod nadležnih institucija. Ovo je za menadžment preduzeća nevažno pitanje, a važno je meni ispostavljati račune za kanalizacionu mrežu, na koju nisam priključen. I zamislite apsurd: Od mene tražite da plaćam nešto što ne koristim, a ne plaćate ono što Vi koristite. Nadam se da će pravda biti zadovoljena.

Odgovor: Inicijativa je dostavljena JKP "Vodostan" d.o.o. Ilijaš i u prilogu dostavljamo odgovor, akt broj: 1828/20 od 06.08.2020. godine.

ADEM ALIĆ - vijećnik SDA

Inicijativa upućena Službi za saobraćaj, stambeno-komunalne poslove i građenje i nadležnim organima: "Pokrećem inicijativu da se u ulici 126. ilijaške brigade, od zgrade Općine do gradske džamije Ilijaš, uključujući i gradski trg "Alija Izetbegović", u saradnji sa nadležnim organima, koji upravljaju navedenom ulicom, a u skladu sa Pravilnikom o postavljanju saobraćajne signalizacije i opreme na putu, te drugim zakonskim i podzakonskim propisima, uz saglasnost i odobrenje nadležnog organa za saobraćaj, postavi adekvatna saobraćajna signalizacija i propisane saobraćajne znakove izričitih naredbi, čime bi se stvorila dodatna sigurnost učesnika u saobraćaju.

Obrazloženje: U svakodnevnim razgovorima sa građanima općine Ilijaš, isti su se u nekoliko navrata interesovali kako i na koji način riješiti pojavu velikog broja biciklista (djece bez roditeljskog nadzora, omladine uzrasta 14 godina i stariji, kao i punoljetnih lica), koji se biciklima kreću gradskim šetalištem, tj. pješačkom zonom, i to na dijelu ulice 126. ilijaške brigade, od zgrade Općine do gradske džamije Ilijaš, uključujući i gradski trg "Alija Izetbegović", obzirom da se na navedenim lokalitetima nalazi veliki broj šetača, prije svega djece, a sve u cilju preventivnog djelovanja na eventualne pojave neželjenih situacija, tačnije mogućnosti pojave povreda pješaka, djece, ali i samih biciklista".


Odgovor: Inicijativa je dostavljena "Direkciji za puteve Kantona Sarajevo" i do slanja materijala nije pristigao odgovor.

Služba za saobraćaj,
stambeno-komunalne poslove i građenje

Broj: 1828 /20
Ilijaš: 06.08.2020 god.

BOSNA I HERCEGOVINA
FEDERACIJA BOSNE I HERCEGOVINE
KANTON SARAJEVO
OPĆINA ILIJAŠ

Služba za privredu i finansije
Služba za saobraćaj, stambeno-komunalne poslove i građenje



U vezi sa vijećničkim pitanjem vijećnika Mehe Džinde sa 44. sjednice OV Ilijaš, održane 29.07.2020 godine dostavljamo:

ODGOVOR NA VIJEĆNIČKO PITANJE


Vijećnik Meho Dzindo obratio se ovom preduzeću sa dva zahtjeva, prvi se odnosio na obračun usluge odvodnje, a drugi u vezi statusa objekata Pumpne stanice Mrakovo.

U vezi sa prvim zahtjevom koji se odnosi na obračun naknade za odvodnju ističemo slijedeće. Redovna aktivnost Preduzeća je usaglašavanje i ažuriranje spiskova sa predstavnicima Mjesnih zajednica o korisnicima koji su priključeni na kanalizacionu mrežu, jer je činjenica da nerijetko upravo MZ vode aktivnosti oko dogradnje i proširenja sekundarnih kanalizacionih vodova. Zbog toga i provodimo ovaj vid komunikacije i koordinacije sa istim. Prema novim ažuriranim podacima iz MZ Mrakovo, Meho Dzindo je bio na spisku onih koji su priključeni na kanalizacionu mrežu, te je na osnovu toga uveden na evidenciju za obračun. Nakon prigovora imenovanog i utvrđivanja činjeničnog stanja na terenu od strane naših radnika, utvrđeno je da je došlo do pogreške i da isti nije spojen na kanalizacionu mrežu, pri čemu je izvršena ispravka i storniran je iznos koji je neosnovano zadužen, što znači da je greška već ispravljena i korisnik nije oštećen.

Drugi zahtjev se odnosio se na status objekta Pumpne stanice Mrakovo izgrađene 80-ih godina od strane građana za vodosnabdijevanje tog područja. U zahtjevu je ostavljen kontakt telefon i tražio se sastanak sa direktoricom. Dana 16.07.2020 godine, na telefon koji je označen na zahtjevu, imenovani je pozivan kako bi se dogovorio termin sastanka, na koji se niko nije javljao, isto se može dokumentovati i ispisom poziva telekom operatera. I dalje stojimo na raspolaganju za svaki vid komunikacije oko navedenog pitanja.

S poštovanjem,

Dostaviti:
1 x Naslovu
1 x a/a


Direktorica, JKP "Vodostan" d.o.o Ilijaš

Zukić Belma, dipl.pravnik